



Adresa: **Ul. H. Čemerlića 39**
71000 Sarajevo
<http://www.voda.ba>

tel. +387 33 726 412
fax. +387 33 726 414
e – mail: info@voda.ba

Broj: **UP-1/21-1-40-413-3/26**

Datum: **18.08.2026. godine**

«Agencija za vodno područje rijeke Save» Sarajevo (u daljem tekstu Agencija) rješavajući po zahtjevu Agencije podnesenom putem „Sektora za realizaciju investicionih projekata“ za donošenje Rješenja o prethodnoj vodnoj saglasnosti za vađenje materijala iz korita rijeke Une, na lokalitetu uzvodno i nizvodno od mosta u centru Kulen Vakufa, grad Bihać, na osnovu člana 139. stav (1) tačka 6. Zakona o vodama («Službene novine Federacije BiH», broj 70/06) i člana 200. stav (1) Zakona o upravnom postupku («Službene novine Federacije BiH», broj 2/98, 48/99 i 61/22) **donosi**

RJEŠENJE

o prethodnoj vodnoj saglasnosti

1. Podnosiocu zahtjeva, Agenciji, podnesenom putem „Sektora za realizaciju investicionih projekata“, daje se prethodna vodna saglasnost u svrhu provođenja daljih aktivnosti na dodjeli prava na vađenje materijala iz korita rijeke Une i izradi Elaborata za vađenje materijala iz korita rijeke Une, na lokalitetu uzvodno i nizvodno od mosta u centru Kulen Vakufa, koji obuhvata dio zemljišne čestice označene kao k.č. broj 1488 K.O. Kulen Vakuf (k.č. broj 1037 prema podacima iz ISV-a AVP Sava, navedenim u izvještaju Komisije), na prostoru Federacije BiH, grad Bihać.
2. Prethodna vodna saglasnost prestaje da važi ukoliko u roku od tri godine, od dana izdavanja ovog rješenja, ne bude podnesen zahtjev za izdavanje vodne saglasnosti od strane pravnog lica kome bude dodijeljeno pravo na vađenje materijala.
3. Prethodna vodna saglasnost se daje na osnovu pregleda dokumentacije dostavljene uz zahtjev i uz zadovoljenje slijedećih uslova:
 - 3.1. Za namjeravano vađenje materijala iz korita rijeke Une na lokalitetu uzvodno i nizvodno od mosta u centru Kulen Vakufa, pravno lice kojem bude dodijeljeno pravo na vađenje materijala dužno je pripremiti potrebnu dokumentaciju kao i Elaborat vađenja materijala koji će sadržavati:
 - geodetsko snimanje (ne starije od tri mjeseca) situacije i poprečnih profila riječnog korita (na rastojanju do 50,00 m) i uzdužne profile u razmjeri 1:100 ili detaljnije, koje se izvodi preko operativnog poligonog vlaka sa osiguranjem krajnjih tačaka poprečnih profila na terenu trajnim biljegama uz položajni opis i nacrt (trigonometrijski obrazac 27), preko kojih će se po završetku radova izvršiti kontrolna geodetska snimanja,
 - izrada situacije lokaliteta na kome se planira vađenje materijala, uzdužnog i poprečnih profila riječnog korita u odgovarajućoj razmjeri,
 - tehničko rješenje načina izvođenja radova i utvrđivanje njihovog obima koje će obavezno uzeti u obzir da se tim radovima bitno ne remete prirodni procesi, ne remeti prirodna ravnoteža ekosistema ili ne pospiješi štetno djelovanje voda,
 - dinamika vađenja materijala,
 - bilans masa materijala,
 - definiranje lokacije i površine deponije u zavisnosti od utvrđene količine materijala vodeći računa da se ista ne može nalaziti u inundacionom pojasu,
 - na osnovu podataka iz katastarskog plana, na preglednoj situaciji obilježiti granice parcela koje su u državnom, odnosno privatnom vlasništvu, a nalaze se u zoni planiranih radova i gradilišta, trasu pristupnog puta i lokaciju deponije izvađenog materijala,
 - deponija izvađenog materijala mora biti locirana izvan uticaja velikih voda (izvan plavnog područja) i izvan vodnog dobra i javnog vodnog dobra,
 - mogući uticaj na izvoriste pitke vode čije se zone sanitarne zaštite prostiru ili su u neposrednoj blizini predmetnog lokaliteta, ako takvo postoji i uvjeti za zaštitu izvorišta prilikom izvođenja radova,
 - pregled postojećih korisnika vode sa vodotoka,
 - ocjena mogućnosti nastanka negativnih uticaja na druge objekte i postrojenja, korito vodotoka, površinske i podzemne vode, stečena prava korisnika, naselja i sl. i mjere za ublažavanje tih uticaja.

- 3.2. Dinamika vađenja materijala treba da se vrši u periodu usaglašenom sa ribolovnim društvima, odnosno korisnikom ribolovnog prava na ovom ribolovnom području, vodeći računa o periodu mriještenja plemenite ribe.
- 3.3. Izvođač radova dužan je riješiti imovinsko-pravne odnose sa vlasnikom zemljišta za pristup lokalitetu vađenja materijala, kao i do lokaliteta za odlaganje izvađenog materijala, a prije vađenja materijala iz vodotoka.
4. Prije podnošenja zahtjeva za izdavanje vodne saglasnosti izvođač radova, sa kojim se sklopi Ugovor o izvođenju predmetnih radova, dužan je izraditi elaborat za vađenje materijala iz vodotoka. Elaborat će se uraditi u skladu sa članom 5. stav (3) Pravilnika o sadržaju, obliku, uslovima, načinu izdavanja i čuvanja vodnih akata («Službene novine Federacije BiH», broj: 31/15, 55/19, 41/20 i 63/22), a isti treba da bude urađen od strane ovlaštenog pravnog lica (lista „A”) shodno Pravilniku o uvjetima i kriterijima koje mora zadovoljiti pravno lice za izradu dokumentacije na osnovu koje se izdaju vodni akti («Službene novine Federacije BiH», broj 17/08), te u skladu sa uslovima datim u dispozitivu ovog rješenja.
5. Uz zahtjev za izdavanje vodne saglasnosti, treba dostaviti sljedeću dokumentaciju:
 - Elaborat izrađen u skladu sa uslovima iz dispozitiva ovog rješenja,
 - Ugovor o izvođenju predmetnih radova potpisan sa Agencijom za vodno područje rijeke Save, Sarajevo,
 - Dokaz o izvršenoj uplati upravne takse u iznosu od 60 KM,
 - Ovjerenu kopiju rješenja o upisu u sudski registar i identifikacioni broj,
 - Saglasnost udruženja sportskih ribolovaca na vađenje materijala iz korita rijeke Une na predmetnom lokalitetu u periodu definiranom dodijeljenim ugovorom,
 - Validne dokaze Izvođača da je riješio pitanje imovinsko-pravnih odnosa na trasi pristupnog puta do lokacije vađenja materijala iz vodotoka, te do lokacije za deponovanje kao i na samoj lokaciji za deponovanje izvađenog materijala.
6. Ukoliko nakon izdavanja ove prethodne vodne saglasnosti, a u toku pripreme dokumentacije za podnošenje zahtjeva za izdavanje vodne saglasnosti, nastupe okolnosti za koje se može pretpostaviti da mogu biti od uticaja na rješavanje zahtjeva za donošenje rješenja o vodnoj saglasnosti, potrebno je o istim obavijestiti ovu Agenciju (ugovorni organ), a u zahtjevu za izdavanje vodne saglasnosti navesti te okolnosti.

Obrazloženje

Podnosilac zahtjeva, Agencija, putem "Sektora za realizaciju investicionih projekata", dostavio je zahtjev dana 12.08.2026. godine za izdavanje prethodne vodne saglasnosti za vađenje materijala iz korita rijeke Une, kao jedne od mjera za sprečavanje štetnog djelovanja voda na lokalitetu uzvodno i nizvodno od mosta u centru Kulen Vakufa, koji obuhvata dio zemljišne čestice označene kao k.č. 1488 K.O. Kulen Vakuf (k.č. broj 1037 prema podacima iz ISV-a AVP Sava, navedenim u izvještaju Komisije), na prostoru Federacije BiH, grad Bihać.

Uz zahtjev je dostavljena slijedeća dokumentacija:

- Kopija Rješenja o izmjenama podataka u sudskom registru Općinskog suda u Sarajevu, broj: 065-0-Reg-25-003258 od 13.08.2025. godine izdato od strane Općinskog suda u Sarajevu,
- Kopija uvjerenja o poreznoj registraciji, Porezna uprava FBiH - Kantonalni porezni ured Sarajevo, od 14.12.2012. godine,
- Kopija obavještenja o razvrstavanju pravnog lica prema klasifikaciji djelatnosti, broj: 07-32.5-45391/12 od 11.12.2012. godine, Služba za statistiku za područje Kantona Sarajevo,
- „Izvještaj komisije sa uviđaja na licu mjesta radi sagledavanja stanja vodotoka Une i prijedloga mjera za prevenciju od poplava na području MZ Kulen Vakuf, Grad Bihać" broj: 30-754-4/26 od 15.06.2026. godine (kopija),
- Kopija odluke o utvrđivanju potrebe za vađenje materijala iz vodotoka Une, broj 30-754-5/26 od 24.06.2026. godine, u procijenjenoj količini od 2375 m³, donesena od strane Agencije na temelju izvršenog uviđaja na predmetnom lokalitetu,
- Konstatacija da k.č. broj 1488 iz Popisnog lista broj 174 K.O. Kulen Vakuf upisana kao Javno dobro-vode prema važećem katastarskom operatu odgovara k.č. broj 14-7 upisana u P.I. broj 113 kao društvena svojina – vode, br. akta: 03-3-26-29/23 od 16.01.2023. godine, Služba za urbanističko planiranje, građenje, imovinsko-pravne i geodetske poslove, Grad Bihać (kopija).
- Posjedovni list broj 113 za parcelu k.č. 14-7 K.O. Kulen Vakuf, Odsjek za geodetsko-katastarske poslove, Grad Bihać, od 31.01.2023. godine (kopija),

- Popisni list broj 174 za parcelu k.č. 1488 K.O. Kulen Vakuf, Odsjek za geodetsko-katastarske poslove, Grad Bihać, od 31.01.2023. godine (kopija),
- Geodetski snimak R 1:1000,
- Skica lokacije (ortofoto snimak predmetnog sprudišta).

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u cilju utvrđivanja relevantnih činjenica u ovoj upravnoj stvari.

U skladu sa članom 124. stav (1) Zakona o vodama i članom 21. Pravilnika o sadržaju, obliku, uslovima, načinu izdavanja i čuvanja vodnih akata o zahtjevu je dana 13.08.2026. godine obaviještena javnost putem obavještenja na oglasnoj ploči «Agencije za vodno područje rijeke Save» Sarajevo i u dnevnom glasilu „OSLOBOĐENJE“. U datom roku nije bilo pisanih izjašnjenja o predloženim aktivnostima iz zahtjeva.

U provedenom ispitnom postupku konstatovano je slijedeće:

U cilju utvrđivanja činjeničnog stanja, odnosno stanja riječnog korita i obala na dionici rijeke Une u Federaciji BiH je aktom broj: 30-754-3/26 od 20.05.2026. godine formirana Komisija za utvrđivanje potrebe za vađenjem materijala iz korita rijeke Une na lokalitetu neposredno uzvodno i nizvodno od mosta, koji obuhvata dio zemljišne čestice k.č. 1488 K.O. Kulen Vakuf. Nakon uviđaja na terenu, Komisija je dana 15.06.2026. godine sačinila „Izveštaj komisije sa uviđaja na licu mjesta radi sagledavanja stanja vodotoka Une i prijedloga mjera za prevenciju od poplava na području MZ Kulen Vakuf, Grad Bihać“ u okviru koga je dato stručno mišljenje i priložena fotodokumentacija sa kratkim opisom stanja na terenu i zaključkom za dalje postupanje. U stručnom mišljenju je konstatovano da na predmetnoj lokaciji, po procjeni Komisije, ima oko 2375 m³ šljunkovitog materijala, te da treba pokrenuti postupak za uklanjanje predmetnog materijala iz korita rijeke Une.

Količina materijala predviđena za vađenje utvrđena je u skladu sa članom 63. Zakona o vodama, kojim je propisano da „Vađenje materijala iz vodotoka dozvoljeno je u obimu i na način koji bitno ne mijenja prirodne procese, ne remeti prirodnu ravnotežu ekosistema ili ne pospješuje štetno djelovanje voda“.

Na osnovu provedenog uviđaja na lokaciji, sačinjenog Zapisnika, stručnog mišljenja i fotodokumentacije, donesena je od strane AVP Sava odluka o utvrđivanju potrebe za vađenje materijala iz vodotoka Une, broj: 30-754-5/26 od 24.06.2026. godine, čime su se stekli uslovi za pokretanje upravnog postupka, a sve prema odredbama člana 6. Uredbe o načinu dodjele prava na vađenje materijala iz vodotoka («Službene novine Federacije BiH», broj 58/15).

Uslov u tački 2. propisan je na osnovu člana 111. stav (3) Zakona o vodama.

U skladu sa odredbama člana 5. stav (3) Pravilnika o sadržaju, obliku, uslovima, načinu izdavanja i čuvanja vodnih akata propisani su uvjeti iz tačke 3. dispozitiva rješenja.

Na osnovu priložene dokumentacije u kojoj je utvrđena potreba za vađenjem materijala iz korita rijeke Une na lokalitetu uzvodno i nizvodno od mosta u centru Kulen Vakufa, na prostoru grada Bihaća, u procijenjenoj količini od 2375 m³, u dispozitivu ovog rješenja su utvrđeni uvjeti kojima mora udovoljiti dokumentacija na osnovu koje će se pokrenuti postupak za izdavanje vodne saglasnosti za vađenje materijala, a sve u skladu sa članom 111. stav (1) Zakona o vodama, članom 5. stav (3) i (4) i članom 10. stav (3) Pravilnika o sadržaju, obliku, uslovima, načinu izdavanja i čuvanja vodnih akata.

UPUTA O PRAVNOM LIJEKU:


Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, putem ove Agencije, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15,0 KM administrativne takse, prema tarifnom broju 3. Tarife Federalnih administrativnih taksi.

Obrađivač akta

Nihad Pezo, dipl.inž.građ.

Po ovlaštenju
Rukovodilac sektora za izdavanje vodnih akata



Dostaviti:

- AVP Sava – Sektor 30
- ⊖ AVP Sava, ISV-vodna knjiga – ovdje
- Arhiva – ovdje
- AVP Sava – Oglasna ploča